

Frank Leest, relacionista publico di FCCA:

“Danki na programa BoBario casnan di varios compleho a wordo renoba”

ORANJESTAD - E casnan di Yuwana Morto, Jara y Pos Chikito Complex ta proyectonan realisa den añanan 80 cu a sirbi pa un grupo den comunidad, pero cu awendia no ta pas mas. Esaki ta motibo cu Gabinete Mike Eman, un-abes cu el a tuma gobernacion over di pais Aruba, a cuminsa na ehecuta e programa BoBario, cu ta encera mehora e infraestructura y brinda un miho calidad di bida na ciudadanonan. Den cuadro di e programa aki, a pasa e casnan di e tres complehonan na Yuwana Morto, Jara y Pos Chikito pa FCCA, esaki cu e condicion cu nan mester wordo renoba y cu FCCA ta keda encarga cu e gastonan.

Diabierna ultimo tabata asina leu cu un parti di e 52 casnan na Pos Chikito Complex

a wordo entrega na FCCA pa finalisa cu e ultimo parti y entreg’e na e habitantenan bek. Mientras cu FCCA ta percura pa renobacion, Gobierno a tuma na su encargo e parti di infraestructura.

Ta papia di en total mas di 150 cas cu a wordo construi den e prome mita di añanan 1980 y specialmente pa personanan soltero of pareha, casnan chikito cu a cumpli cu nan meta pa e periodo ey. E casnan sinembargo, Leest a splica, a deteriora door cu e mantencion tabata minimo. “Pero e biaha aki Gobierno a dicidi di bini cu un proyecto special den e barionan. Nos a cuminsa na Yuwana Morto Complex, bou di e programa di BoBario y nos a renoba e viviendanan por completo y Gobierno a percura pa e in-

fraestructura,” Leest a splica. FCCA ta trahando riba tanto renobacion di e casnan di e compleho na Jara como esnan na Pos Chikito simultaneamente. A cuminsa na Yuwana Morto, unda cu tur e casnan ta renoba y ta finalizando cu e parti di infraestructura. Na Pos Chikito e contratista a finalisa e prome 12 viviendanan. Remarcabel ta cu den e periodo di renobacion, FCCA mes ta percura pa acomodacion di e habitante na un di su propiedadnan. FCCA ta programa cu renobacion di e mas di 150 cas ta cla e aña aki ainda, aunke cu el a muestra cu e parti infraestructura ta tarda un poco ya cu e parti aki ta trabounan mas complica. E habitantenan semper ta keda bon informa di loke ta pasando y semper ta pidi nan

pa mantene nan bario limpi. Un 60% di e habitantenan ta riba 55 aña y a tene cuenta cu esaki dor di brinda nan mas facilidad na nan cas, manera un porch pa sinta combersa cu bisña of areanan pa nan hunga domino. “Mehora calidad di bida di e ciudadanonan aki ta un di e metanan tras di e renobacionnan,” Leest a duna di conoce. E relacionista publico a enfatisa cu FCCA tabata consciente, manera ta e pensamiento di Gabinete Mike Eman, cu mester mehora calidad di bida den e barionan. Pero FCCA no por haci’e su so, pasobra e mester keda pagabel. Principalmente infraestructura ta trece gastonan halto cu FCCA no por a carga pa cual nan ta contento cu Gobierno a hinca esaki den su plan di gobernacion pa loke ta



**Relacionista Publico di FCCA,
Frank Leest.**

barionan. “E tabata un prioridad di Gobierno y nos por a haci bon uzo hunto pa mehora e barionan y man habri nos a gara e oportunidad aki.” □